

# 東文選

四十七

内閣文庫	
番號	漢 17777
冊數	130 ( 47 )
函號	116 1





東文選卷之四十七

狀

謝詔狀

崔致遠

右臣伏奉四月十日詔旨黃巢兇逆穢黷宮城罪惡貫盈人神共怒尋東兵合勢剪滅元兇想副朕懷已遵道路佇聞克復永耀功名者十行天語萬里星飛捧窺而壯膽初驚跪讀而愁眉頓豁竊以黃巢禍心斯極狠力既衰肉已太醜果將自落暫起烟塵之患則歸原野之誅臣每當永夜枕戈早願中流叩楫自啓行十乘已長駐五旬伏緣江路

多虞風波未便整淹行色用候良時非致役於遷延但興懷於矍鑠今則仰觀鳳銜之詔况乘隼擊之秋俯勵軍謀仰遵睿筭即冀朝離江北暮到漢南長驅背水之師永破滔天之孽率奮義感恩之衆氣已凌雲殄藏奸匿暴之徒勢如沃雪伏惟陛下歲巡備禮時邁傳歌將示罪於三危乃宣威於七德臣遠承獎諭誓盡勤勞身暫寄於戈船心每馳於劍閣唯願西都獻捷早申收復之微功東嶽告成得覩登封之盛事臣無任感激兢懼之至謹奉狀陳謝以聞

謝就加侍中兼實封狀

右臣得進奏院狀報伏奉某月日恩制加授臣侍中餘並如故仍加食實封一百戶者九重降命萬里傳聲側聆而踊躍忘疲內揣而怔忡失措伏以納言進秩頒邑賞功固須德望鎮時仍有勲勞濟物然後方可謂君無虛授臣無虛受如臣者謬提旄鉞免墜弓裘空有志於四方竟無能於一割况自群兇蝟結戰陣蛇奔狂鱗久戲於鼎中聖駕遠巡於劍外臣也動不能剗煙塵之患靜不能瞻山海之資遂蒙改易兵權分張權課雖值盤根錯節

其如有斧無柯安邦之計策何成富國之機謀莫就唯甘黜爵以警慢官豈期陛下恩洽無偏義深宥過特超衆例許陟高資印標石鵠之祥早慙不次冠聳金貂之飾愈覺非宜况叨真食之榮實愧素餐之咎但屬狼星未滅鯨波猶翻方期抗旆以專征不敢懸車而請老謹當訓兵是務殄復爲期粗申武弁之威仰報彤門之賞臣限守藩鎮不獲稱謝行在無任感息戀聖戰汗屏營之至

奏請叛卒鹿晏弘授興元節度使狀

右當道賀正子將許令琮等今日迴得狀稱三

月五日陳許軍潰散節級鹿晏弘領兵馬貳萬餘人打破金洋等州突入興元府坐節度使半勗四日夜領隨從人并家累約貳千餘人奔投龍州西山谷者伏以天未悔禍地多受災既當易動難安非可懲一勸百鹿晏弘早驅散卒廣集叛夫始聆焚劫東都旋見奔衝西路本道節度使周岌累令招諭終不歸降豈興破浪之風但熾燎原之火今者逆黨則鯨吞盛府元戎則鼠竄危塗瓜距已成根株難剗儻或未怒亂常之咎別興伐叛之師即恐終成一秦固應不利三蜀且列藩貢獻諸道表

章得達乃州皆由劍路况乃鳳城已復鑿輅將旋  
縱今鷓鴣在天能摧狡窟若更豺狼當道必礙行  
宮峽路雖通水程多慮不唯險阻實且遐遙兼至  
上江皆為賊境唯憂進獻莫遂通流臣久竊寵光  
深懷驚憤遠詳事意輒具奏陳伏乞聖慈霽雷霆  
之威迴雨露之澤速飛寬大之詔特委撫綏之權  
庶晏弘免致虜驚便能豹變必當克已永務安人  
聖主含弘既宥其窮斯濫矣姦臣警悟亦免於尤  
而效之謹錄奏聞伏聽勅旨

賀殺黃巢賊徒狀

右得進奏院狀報定難軍托跋相公保大軍東方  
達尚書奏於宜君縣南殺戮賊徒并生擒賊將又  
鳳翔李相公奏探知京中賊徒潰散六月十三日  
聖上御宣政殿排仗受賀者竊以逆賊黃巢稔惡  
既多就刑非久敢驅烏合之衆屢拒鷹揚之師托  
跋相公東方尚書或力微裔孫或曼倩餘慶皆伸  
秘略共殄兇徒能順天誅遂陳月捷軍名定難雅  
稱關張之聲縣號宜君克符堯舜之德是以聖上  
高臨紫極遠輝皇威睹百辟之歡呼雷驚蜀國想  
六師之勇戰電掃秦川昂當靜滅氛霾永見均施

渥澤此皆相公調鼎中之味運堂上之兵右援袍  
而得攻左執律而至獻勲功相繼稱慶何窮某以  
阻淮夷尚淹海徼遠聆捷語但切歡聲然必願劔  
拂狼星旗延聖日終繼張飛之拒俊不慙攝叔之  
致師限守戎藩未由陳賀下情無任踴躍之至

謝加侍中兼實封狀

右得進奏院狀報伏奉十一月十一日恩制加授  
侍中仍加食實封一百戶者伏以某材翰美箭業  
紹良弓早勤式遏之規敢怠聿修之訓遂得一分  
戎閫七換師壇提漢法之重權陟秦官之極品恩

濡生前之溝壑無虞飢寒雖濟頭上之丘山漸重  
負戴難勝依投而既類窮猿展効而願同病雀下  
情無任云云

謝職狀

右某今月二十五日伏奉公牒特賜署充館驛巡  
官者恩降台堦先生旅舍承命而吟魂乍懾叨榮  
而病骨能蘇攀依有心荷戴無力伏以某擣生曠  
野莠託荒田豈唯良匠不窺抑亦農人見奔風敬  
弱植難舉勢於凌雲塵織莖但懷愁於委地昨  
者不慙狷者輒效狂生累貢巴詞仰投秦鑿伏惟



司徒相公念以來從異域遠寓樂郊俯愛似龍不  
嫌非鳳拔衰英於糞上搜滯刃於獄中許厠嘉賓  
仍沾厚俸神仙見顧稍親郭隗之臺鴛蹇何施得  
主鄭莊之驛况乃念子襟之志業辱華袞之褒詞  
刻畫恩深已能長價琢磨志切終願成功修身則  
飲水懷冰鍊思則吟煙嘯露唯當勵節以謂報恩  
謹詣衙門祗候陳謝下情無任感激彷徨榮懼之  
至

### 謝借宅狀

右某昨日客司奉傳慶分借賜官宅安下者仰聆

尊旨俯省庸才既榮投跡之有門唯恨殺身之無  
路伏以某自趨龍旆免泣牛衣職俸非輕書糧頗  
贍嘗讀魯論語曰學而優則仕仕而優則學是以  
望東開之閣永誓依仁坐北面之窓唯期隸業非  
敢隱居而不嫁祗將直道而自媒今者幸寓樂郊  
况棲靜室簷簷則不勞涉遠簞瓢則永遂安貧豈  
謂愛閑誠堪養勇三年就學非無慕蘭之心一日  
成功願滿依劉之志下情無任感恩激切兢惕之  
至

### 出師後告辭狀

右某伏念來從異域託在德門昔曾名列桂科未  
知稱意今忝職居蓮府始覺榮身恩既厚於稻梁  
跡能安於萍梗日增學植月瞻書糧豈期市駿之  
金榜沾鶩蹇唯愧封侯之印未効禎祥今者屬以  
大憝逋誅中朝多難須煩豹略佇滅豺聲伏惟太  
尉相公身耀福星均臨庶類手傾霖雨遍洗妖氛  
遠命舟師重興國祚華夷則望風競抃蠢植則尅  
日當蘇若某者空有肺腸萬重禱祝恨無羽翼一  
遂奮飛望龍節以魂銷窺虎威而股慄雖則熊羆  
之力共喜安人其如犬馬之心常增戀主下情無

任攀依激切涕泣之至

謝今從軍狀

右某適見客司奉傳處分今借舟船隨從行李者  
深恩既降壯氣潛伸勵心而願效驅馳感德而難  
勝踴躍伏以某塵中走吏海外腐儒五能非自濟  
之資一割無可施之處唯增慷慨已分沉淪豈無  
投筆之心時應未偶空有請纓之志力且難成誰  
謂忽被殊私不遺賤跡許隨旌旆借賜舟航蹇足  
無堪敢望維駒之念麼姿何幸遽叨汎鷁之榮况  
當泣路之時永荷濟川之賜下情無任感戴欣躍

兢惕之至

謝借舫子狀

客司奉傳處分借賜舫子安下者某方脫窮鱗得  
攀畫鷁自慙跡在塵吏忽訝身為水仙則彼甘寧  
割錦纜而呈奢顧愷假布帆而無恙豈若榮接德  
宇又泛仙舟風波無失所之憂煙月有搜吟之暇  
况清流滿望暑氣銷威每當定志安神則乃銘肌  
刻骨謹課七言長句詩一首齊沐上獻干黷台堦  
下情無任荷戴兢惕之至

謝許奏薦狀

右某昨日見衙前兵馬使曠師禮奉傳處分特賜  
慰問兼許奏薦今自修狀本來者俯慙蓬跡仰聽  
蘭言喜抃而身輕欲飛兢惶而心戰難過何者某  
職叨鄭驛已謂極榮名達堯堦實為過望憑何展  
効佩此恩光况乃朗鑿冰開英才霧集所宜倒屣  
則先迎王粲築臺則次接劇辛如某者輟耕海上  
之田來泣塵中之路雖云遊學尚未成功豈料勤  
勞莫副於指蹤獎念已全於卯翼許今伐善將使  
警愚每思邾子之驟稱深慙速謗欲効黃公之多  
讓又恐失時冀緝拙詞仰遵嚴命南宮适之問宣

父實有所歸東方朔之對漢皇寧辭自責既忝風  
雷之變化佇期雨露之沾濡下情無任感戴榮抃  
兢灼之至

謝加料錢狀

右某今日某官奉傳處分每月加給料錢二十貫  
者某厚沾職俸過贍書糧羝羊之角且不羸鼯鼠  
之腹能易滿唯憂福盛難報恩深豈料筆端之白  
鳳之詞曰無可効囊底獲青鳧之術月有所增但  
懷臨谷之心恐敗負山之力唯願除供陋巷之食  
分濟遠鄉之親同感厚息永傳遐俗或成浮費必

速幽誅下情無任荷戴兢惶涕泣之至

謝衣段狀

某啓伏蒙恩慈賜及生衣段一十疋者伏以風雖  
解愠日可畏威始當蒸鬱之時忝受鮮華之賜敢  
效八公之侶欲銜六銖但隨百姓之歡同歌五袴  
况乃某幸趨台陞榮託德門實資千載之遭逢每  
濟四時之服飾愍念而情逾父母稱敷而禮異賓  
僚今者輕縠衫材細練構制俾趨儉慕許曳鄒裾  
雖恩耀遠人足呈妍於鮫室而名慙奇士甘致刺  
於鷓梁下情無任感戴之至

謝借示法雲寺天王記狀

某啓昨日伏蒙恩慈借示修法雲寺天王碑綵毫  
乍閱俗眼初醒唯慙鐵印之傭流忽睹銀鈎之妙  
跡旣成國寶豈許家藏竊聆將勒貞碑始揮神筆  
風亭減暑天酒呈祥固知垂露之蹤便成甘露况  
假崩雲之勢求耀法雲宜乎琬琰之詞鎮彼瑠璃  
之地共傳嘉瑞遠振芳聲然則隋煬帝之故都求  
為寶窟謝將軍之舊宅終作福田下情無任捧讀  
師禱榮懼之至

謝示延和閣記碑狀

某啓昨日觀察衙推邵宗奉傳處分賜及延和閣  
記碑本一軸者跪展真蹤仰窺巨節對銀鈎而手  
舞足蹈望玉輦而魂飛膽揚伏以太尉力贍補天  
心勤捧日遂啓遷都之議佇聆徒蹕之期恭候宸  
遊儼成壯觀但以尋章摘句素非吳主之心進牘  
抽毫唯在陳王之命爰令幕客謹撰碑詞支使侍  
御立門顏回融帳盧植能揮直筆妙寫尊襟敘三  
年望幸之丹誠則鼓傳衆聽述一片勤王之忠節  
則鏡照群迷實乃酣飫德馨備陳事實永使奇功  
秘略皆今陋古榮今太尉相公志切迎鑿喜勝覽

檄既贊美於凌雲百尺將掩能於八木八分遂乃  
親染綵毫俾鑄翠琰隨手而龍蛇旋活迎鋒而劍  
戟交橫畫玉點珠豈可比蘭亭醉本檄雲挑霧只  
宜示遼島真仙誰料末儒亦叨殊貺輒敢覬覦獎  
顧是知誘諭庸庸何則名題桂宮跡隸蓮府雖忝  
一時之有遇實無萬代之可稱今者支使侍御以  
好善心得替古力勝真才子之藻思辱大丞相之  
筆蹤雅為賓席殊榮別是儒家盛事則彼郭隗受  
黃金厚禮虞卿沾白璧深恩強欲比方却成浼黷  
然則四方舐墨含筆之士也莫不競効嚙眉之態

潛希唾口之恩仰脩脩然勤慤慤爾如某者學海  
至海雖云有心執柯伐柯猶恐傷手持弊箒而徒  
增健羨遇神錐而便欲投降唯願讀五千卷之書  
庶幾入室把十九年之刃無愧發硎每睹仙書更  
敦壯志稍希異闕黨童子何敢望儒林丈人其所  
賜碑唯慎捧持敢矜披閱待過天池之外遍誇日  
域之中想彼驪龍領下之珠永當減價巨鼇頭上  
之客必欲偷看下情無任寶玩師仰之至

謝改職狀

右某伏蒙仁恩特賜公牒改署館驛巡官今隨旌

旆西去者雖命重難荷而身輕欲飛稱心懷捧檄  
之榮滿口詠從軍之樂唯慙幽劣有辱獎怜感恩  
而既識海深舉步而但憂冰薄况無孫奉之精騎  
自比顏峻之小兒將何以剖析事機游敷德業然  
所願者得睹龍飛玉劍豹掣牙旗風雷振大捷之  
聲日月照中興之運則某也有望於一言長價或  
為天上之人萬里從知免作池中之物行唯踴躍  
坐則禱祠下情無任榮抃兢灼之至

謝探請料錢狀

某啓某頃者西笑傾懷南音著操蓬飛萬里迷玉

京之要路通津桂折一名作金榜之懸疣附贅乃  
是常常之事後云遠遠而來海隅未覺於榮家江  
徼况勞於佐邑由是詠南陔而引咎望東道以知  
歸伏蒙太尉念掃德門許遷代舍孺毫染牘深慙  
雪苑之清才頂多腰魚遽忝霜臺之峻秩傳天上  
披朱之命榮日邊垂白之親以宣父見知則實同  
陳隼以遠人多幸則不讓漢貂雖乘就養無方必  
想宗族稱孝然而烟波阻絕難申負米之心風雨  
淒涼空灑梁山之泣既踈溫清又闕旨甘但切責  
躬敢言養志况久無鄉使難附家書唯吟陟岵之

詩莫遇渡溟之信今有本國使船過海某欲買茶  
藥寄附家信伏緣蹄泔易竭溝壑難盈不避嚴誅  
更陳窮懇伏惟太尉念以依門館次三千客別庭  
闈已十八年既免行傭有希反哺特賜探給三箇  
月料錢所冀祿遂及親遠分光於異域志能求已  
求投跡於仙鄉干黷台階下情伏增感泣兢悻懇  
迫之至

獻生日物狀

某啓伏以降跡仙山爲行恩於俗界挺神維嶽期  
定亂於危時是以杞梓材長松椿壽永名字已標

於金錄兵符暫理於玉銓伏惟太尉相公負嶠稟  
靈尼丘誕質大任天降中庸日彰四夷識傾膽之  
門遠栖仁蔭萬姓歸返魂之域盡飽德馨况今秦  
甸停氛鎬京聚雙息虎旅奔沉之患望豹篇擒縱  
之機暫施決勝之謀永致昇平之運則必坐寧環  
海後當去會瑤池五色輕雲鎮隨行止千年素鶴  
競效驅馳獨保長生却登真位調鼎佐玉皇之命  
銜盃聽金母之歌自此漢室公卿仰羨而空知望  
斷仙家朋友相逢而不訝來遲某居近鼇峯遇深  
驥坂每睹張良之術唯吟郭璞之詩喜對今辰敢



陳善祝龜蛇病骨叨承救活之恩鷄犬癡心竊有  
奮飛之望下情無任虔禱依攀欣抃之至輒以海  
東藥物輕贖尊嚴謹具別幅

又狀

某啓某聆天降賢人濟天下之人也是以材舍地  
寶性契天和高關德門深匡帝室伏惟太尉相公  
漢師仙格魯聖儒機推心於三代之英鍊氣於五  
行之秀今者正融韶景共慶誕辰四方飽開閭之  
恩萬族獻稱觴之懇伏惟龍鶴雙展靜卷妖氛鳳  
輦遄歸永興清運然後誠白石生之妙術從未松

子之勝遊鼇頭擎五色之雲从勞西望豹尾指二  
京之路暨事北征佇揚滅寇之勲便舉朝真之禮  
某棲身大厦祝壽中春下情無任禱祠歌詠欣躍  
之至謹具別狀輒申微誠

物狀

海東人形參一軀 海東實心琴一張

右伏以慶資五福瑞降三清中春方盛於香風上  
德乃生於遲日凡荷獎延之賜合申獻賀之儀前  
件人參并琴等形稟天成韻含風雅具體而既非  
假貌全材而免有虛聲况皆採近仙峯携來遠地

儻許成功於藥臼必願捐軀如能入用於蓬壺可知實腹誠慙菲薄冀續延長塵黷尊嚴倍增戰灼伏惟俯賜容納

蓬萊山圖一面

右伏以仲陽煦景仙界降真雖長生標金錄之名而衆懇祝玉書之壽前件圖千堆翠錦一朵青蓮雪濤蹙出於墨池鯨噴可駭雲嶠涌生於筆海鰲戴何輕不愧瑣微輒將陳獻望卧龍而股慄隨賀誓以魂飛伏惟略鑒心誠俯賜容納所冀近台座而永安寰海展仙齋而便對家山許沾一顧之榮

預報三清之信輕黷視聽下情無任禱祝歌謠兢灼之至

人參三片 天麻一片

右伏以昴宿垂芒尼丘降瑞始及中和之節爰當大慶之辰仰沐尊慈合申卑禮前件藥物採從日域來涉天池雖徵三桮五葉之名慙無異質而過萬水千山之險貴有餘香不揆輕微輒將陳獻所冀海人之藥或同野老之芹伏惟特恕嚴誅俯容情懇積靈壽則後天而老駐仙顏而與日長新下情無任禱祝忻躍兢惕之至

端午節送物狀

織成鞍僕一條

右伏以晏陰將定今節俄臨遇天地之仁時睹仁  
准之樂境伏惟太尉應五百年之運用八千歲爲  
春仰贊薰風高敷畏日不假渡瀘之役自成匡漢  
之謀某忝在末寮合陳微禮前件鞍僕駕機呈妙  
獸錦成華當憇影於追風或資光於照地伏願鞍  
也助百福永安之慶僕也表四方率服之誠干黷  
尊嚴下情無任禱祝兢惶懇激之至俯賜容納

雪扇一柄

右伏以星火揚輝雲峯聳影遇陳太守饗遙祠之  
節効華封人祝仙壽之誠前件扇細糝飛絲輕鋪  
凍練雖假丹青之跡實含潔白之姿裁規則不學  
齊紈空誇圓月委質則願依孫閣得振仁風謹獻  
台堦無任悚慄伏惟俯賜容納百生榮幸

謝新茶狀

右某今日中軍使俞公楚奉傳處分送前件茶芽  
者伏以蜀岡養秀隋苑騰芳始興採擷之功方就  
精華之味所宜烹綠乳於金鼎汎香膏於玉甌若  
非靜揖禪翁即是閑邀羽客豈期仙貺猥及凡儒

不假梅林自能愈渴免求萱草始得忘憂下情無  
任感恩惶懼激切之至

謝櫻桃狀

右中軍使俞公楚奉傳處分伏蒙賜及前件櫻桃  
者伏以三春之下始閱群芳百果之中獨誇先達  
綴仙露而堪教鳳食被德風而肯許鶯含遂令摘  
自喬枝分其美實豈期末品亦荷深恩捧持而色  
奪楚萍咽嗚而味欺蘇橘何必貯赤瑛盤上最宜  
對白玉樽前句排萬顆之珠不唯眼飽似服一丸  
之藥便覺身輕下情伏增感戴之至

謝冬至料狀

右伏蒙仁恩特賜前件節料者伏以其忝栖德宇  
無愧異鄉萬里滄波雖恨絕東來之信三冬愛日  
且歡迎南至之辰豈料尊慈別垂厚賜玉粒既資  
於同頴霜華乃出於兩歧不勞大嚼之言却懷中  
聖之慮莫識酬恩報德唯知飽食醉吟下情無任  
感戴兢懼之至

謝寒食節料狀

右伏蒙仁慈特賜前件節料米麵羊酒等者伏以  
人舉今回祿沮威正吟化俗之仁風又對順時

之甘雨仰沾豐餼遇贍晨炊况乃蟻慕芳羶蟻浮  
漬醞捧息光而飽飫豈止三朝玩春色以醺酣可  
期千日只知歌詠何報陶鈞下情無任感戴之至

謝社日酒肉狀

右伏蒙恩慈特賜前件酒肉等者伏以候鸞應期  
勾龍受祀一半之韶光欲老千般之旅思相攻只  
知吟樂國之春豈料捧仙家之賜陵分甘膳淮減  
香醲想田夫醉舞之場起海客狂歌之興敢效陳  
平壯志便發大言唯尋徐邈前蹤略判中聖其肉  
并酒謹跪領訖下情無任感戴之至

謝死段狀

右伏蒙仁恩特賜前件死段霞舒鳳縷雪疊鮫綃  
猥分絳帳之餘俾換褐袍之飾不學王尼巧說遽  
叨盧志殊榮唯慙螻蟻之姿不稱蜉蝣之什但願  
勵食藜飲冰之節報披朱拖紫之恩下情無任感  
戴兢惕涕泣之至

遣宿衛學生首領等入朝狀

新羅國當國差遣宿衛學生首領入朝請附國子  
監習業謹具人數姓名分析申奏如後學生八人  
崔慎大首領八人祈緯小首領二人蘇息右臣伏

觀太宗文武聖皇帝實錄貞觀元年宴群臣奏破  
陣樂之曲上謂侍臣曰朕雖以武功定天下終當  
以文德綏海內尋建學舍數百間聚四方生徒無  
何諸蕃慕善會長請遣子弟授業許之自命臣蕃  
益勤航棧頓蛉有子琛贐與偕遂得庇身於米廩  
之中勵志於稷山之下學其四術限以十冬雖慙  
入洛之賢不減浴沂之數况遇開元闡化大設衢  
樽挹彼注茲自近及遠每降漢使精擇魯儒兩錫  
天章一變海俗故得鄉無毀校之議家有斷機之  
親雖扑作教刑僅同刑措且禮聞來學唯競學優

是時登笈之子分在兩京憧憧往來多多益辦至  
今國子監內獨有新羅馬道在四門館北廊中蠹  
彼諸蕃聞其中絕祗如淳海無藉膠庠唯今挑野  
諸生得則杏壇學侶由是海人賤姓泉客微名或  
高掛金牌寧慙附贅或榮昇玉案實賴餘光雖乖  
業擅專門可證人無異國臣竊以東人西學惟禮  
與樂至使攻文以餘力變語以正音文則俾之修  
表章陳海外之臣節語則俾之達情禮奉天上之  
使車職曰翰林終身從事是以每遣陪臣執贄即  
今胄子觀光而能視鯨浪為夷途乘鷁舟為安宅

銳於嚮化喜若登仙况近者蕃臣之寬猛乖宜荒  
服之兇頑得便顏瓢則頓改其樂孔席則愈嗟非  
溫仰聞聖文睿德光武弘孝皇帝陛下俯徇群情  
崇加懿號以聖文冠上光武弼中能使大邦無軍  
旅之事至於小邑有絃歌之聲以此臣蕃鴻漸者  
隨陽是思蟻術者慕羶增切競携持而避亂願匍  
匐以投仁臣今差前件學生等以首領充僦今隨  
賀正使守倉部侍郎級餐金頴般次赴闕習業兼  
充宿衛其崔慎之等雖材慙美箭而業嗣良弓用  
之則行利有攸往輒以多為貴者豈亦遠於禮乎

金鵠是故海州縣刺史金裝親男生在中華歷於  
兩代可承堂構免墜家聲臣敢以興學為先求賢  
是務買書金則已均薄貺讀書糧則竊覲洪恩且  
千里之行聚費猶勞於三月十年為活濟窮唯仰  
於九天幸遇聖朝誕敷文德伏乞怒撞鍾之無力  
憐擊磬之有心垂慈於磁石引針周急於浮埃生  
旣特賜宣下鴻臚寺准去龍紀三年隨賀登極使  
判官檢校祠部郎中崔元入朝學生崔雲等事例  
勒京兆府支給逐月書糧兼乞冬春恩賜時服而  
冀身資飽學無憂餒在其中跡異暗投不愧藝成

而下更霑榮於扶纊終免苦於易衣臣以目想鶯  
喬心攀驥乘仰趨丹陛俯羨青衿實貴儒宗輕脫  
宸鑑無任望恩懷德技癢切瑳之至

奏請宿衛學生還蕃狀

新羅國當國先具表奏宿衛習業學生四人今錄  
年限已滿伏請放還謹錄姓名奏聞如後金茂先  
崔右臣伏以當蕃地號秦韓道欽鄒魯然而殷  
父師之始教暫見躬親孔司寇之欲居唯聞口惠  
郊子則徒矜遠祖徐生則可媿頑仙是以車書欲  
慶於混同筆舌或慙於差異何者文體雖侔其蟲

跡土聲難辨其鳥言字纔免於結繩譚固垂於成  
綺皆因譯導始得通流以此敷奏天朝祇迎星使  
須憑西學之辨方達東夷之情故自國初每陳蕃  
貢即遣橫經之侶聊申慕化之誠唯渙無鰈水之  
靈挺鷄林之秀者不遂他山攻石徒勞陸海探珠  
屬文則高謝歲蕤會莫從心所欲發語則猶多澀  
喜未免惟口起羞趙步易違郢歌難和然則梯航  
執禮每願勤修籩豆司存深慙憎拙若慮耗關中  
之米無因搜席上之珍故臣亡父先臣贈太傅最  
遣陪臣試殿中監金僅充慶賀副使入朝之日差



發前件學生金茂先赴闕習業兼充宿衛其崔渙  
崔匡裕二人金僅面叩玉階請留學問聖恩允許  
得厠費中今已限滿十年威收二物銜泥海鷺久  
汚彫梁遵渚塞鴻宜還舊路况乃國境尚多離亂  
家親切待放歸雖乘大成輒具上請靡慙窺豹之  
說冀試搏螢之功伏乞睿慈俯徇故事特賜宣付  
屬國府司今准去文德元年放歸限滿學生大學  
博士金紹游等例勒金茂先等并首領輩隨賀正  
使級餐金穎舩次還蕃庶使駕馬成規無辭十駕  
之役割鷄新刃聊呈一割之能臣義重在三情深

勸百冒犯宸扆無任激切屏營之至

新羅王與唐江西高大夫湘狀

昔貞觀中太宗文皇帝手詔示天下曰今欲巡幸  
幽薊問罪遼碣蓋為勾麗獷俗干紀亂常遂振天  
誅肅清海徼武功旣建文德聿修因許遠人亦隨  
貢士以此獻遼豕而無愧逐遷鶯而有期惟彼勾  
麗今為渤海爰從近歲繼忝高科斯乃錄外方慕  
善之誠表大國無私之化雖涉於賤難貴鶴或類  
於披沙揀金靖恭崔侍郎放賓貢兩人以渤海烏  
昭度為首韓非同老聃之傳早已難甘何偃在劉

東文選四十七  
二十三  
瑤之前其實堪恨縱謂簸揚糠粃豈能舖啜糟醎  
既致四隣之譏求貽一國之恥伏遇大夫手提蜀  
秤心照秦臺作蟾桂之主人顧鷄林之士子持今  
朴仁範金渥兩人雙飛鳳里對躍龍門許列青衿  
同趨絳帳不容醜虜有玷仙科此實奉太宗逐惡  
之心守宣尼擇善之旨振嘉聲於鼇岫浮喜氣於  
鯉溟伏以朴仁範苦心爲詩金渥克已復禮獲窺  
樂鏡共陟丘堂自古已來斯榮無比縱使糜軀粉  
骨莫報深恩唯當谷變陵遷求傳盛事弊國素習  
先王之道忝稱君子之鄉每當見善若驚豈敢以

儒爲戲早欲遠憑書札感謝眷知竊審烟塵驟興  
道路多阻未伸素懇已至後時空餘異口同音遙  
陳善祝雖願揮毫頌德難盡微誠唯望早離避地  
之遊速展濟川之業求安區宇再活烝黎不獨海  
外之禱祠實爲天下之幸甚

與禮部裴尚書瓚狀

昔者勾麗衛國負險驕盈殺主虐民違天逆命太  
宗文皇帝震赫斯之盛怒除蠡介之群兇親率六  
軍遠巡萬里龔行天罰靜掃海隅勾麗旣息狂飈  
劣收遺燼別謀邑聚遠竊國名則知昔之勾麗則

是今之渤海當國自貞觀中偏荷殊恩永安遠俗  
仍許桑津之學者俾隨槐市之生徒遂有負笈忘  
疲乘桴涉險編名獻賦遂趨於金馬門前舉跡昇  
仙得到於巨鼇山上無何異俗亦忝同科自大中  
初一彼一此春官歷試但務懷柔此實修文德以  
來之又乃不念舊惡之旨有以見聖朝則恩深舍  
垢渤海則志切慕羶既非莫往莫來則亦何先何  
後然至故靖恭崔侍郎主貢之年賓薦及第者兩  
人以渤海烏昭度爲上有同濟魯而肥杞誰驗鄭  
昭而宋馨陶之汰之雖甘沙礫居後時止則止豈

使淄澠並流車書縱賀其混同冠履實慙於倒置  
伏遇尚書高懸藻鑒榮掌桂科既照膽以無差固  
推心而有待前都統巡官殿中侍御史崔致遠幸  
將薄技獲廁諸生先啗牛心得爲雞口免與薛侯  
爭長不令趙將懷嫌實逢至公得雪前恥變化深  
資於一顧光榮遠播於三韓自此已來未之或改  
遂絕積薪之歎益慙刈楚之恩今則崔致遠奉使  
言歸懷材待用粗有可取無辱所知示使鰈水儒  
流鳩林學植競勵觀光之志皆增嚮化之心斯乃  
尚書洞炤九流精修四教善誘風行於闕里深仁

波及於互鄉欲知舉國懷思唯願經邦佐聖無思  
隱霧早遂爲霖拜謁難期瞻攀莫極但遇金風之  
爽節遠想音微每吟珪月之曉光空勞夢寐聊憑  
鴈足略染鵝毛欲代申拜賜之誠唯恨非盡言之  
具

與青州高尚書狀

伏以尚書道習圮書家傳渭訣資潤南山之霧威  
德日彰撫寧東海之波遠方風靡加以察俗則地  
猶開鉞訓兵則谷亦磨鈇自分憂於距岱之藩能  
變俗於臨淄之境指乘夷而作牧豈矜千駟馬之

名招管晏以爲賓寧効五殺羊之禮羨聲能大新  
命匪遙佇連耀於六階未施恩於千里某依棲宇  
下密邇壺中裨海雖深順風斯在求言瞻禱不捨  
斯須其他並令所司各具公牒諮白

乞還鴨江東岸爲界狀

崔惟善

右臣伏自象輅南馳肇裂疆而斯錫鴨江西限在  
命冊以不刊歷及嗣封居爲樂境豈知閒代以備  
外虞截流成浮鷁之梁連壘入剪鷄之界是祈割  
復屢罄判陳愈堅就日之誠方企迴天之望近又  
添營亭候移以遞郵廣展柵圍踰千劃分以至邊

鄙益聳列城嗟早閑晏開民食何依千畝廢春耕  
秋穫今者幸遭鉅聖誕御瑤圖方恢無外之風均  
被自新之澤願還舊壤俾感昌辰

乞抽毀鴨江城橋弓口狀

右臣叨司侯牧既衆感以胥同欲叫帝闈迺遐封  
而罔越是憑露奏妄觸霆威竊念當國肇自稱藩  
勤斯述職敢謂賜圻之內致興成壘之虞比及近  
來以圖深入展鋪形而籠野踰界限以峙郵疆削  
漸多堵安奚暇今所幸者鏡河啓聖寰宇流恩天  
下爲家方忻於廣運日中不隳恐失於良時故於

往年託單个之徑馳部數條之邊願然垂優詔止  
撤小亭猶警候以未蠲實農樵之爲慮十年老將  
及瓜之約難期一境疲民仰穀之情莫遂爭零血  
泣仰告聰聞雖再黷之彌兢蓋群情之所迫倘得  
諧願同慮貢忠伏乞睿慈矜爾之區示霽然之  
允復舊壤無遺隙地表昌朝不遠異方末今丕冒  
之中恪奉率賓之志

東文選卷之四十七

東文選卷之四十七

二十一



